

嘯
古
堂
詩
集

魄力沈雄詞采雋邁落落雲霞之色淵淵金石之聲老境頽唐
田城淩寂讀之不覺色飛眉舞復成二十八字以志傾倒久無
肯石語寒陵忽見中宵虎氣騰滄海日輪光五色笑他天祿校
頭鑑陽湖周儀瞻

十讀茂著七言古骨采奇高尤工樂府一體律句綺麗飛騰兼
有鄉先輩弇州梅村之勝觀自序彼蒼製才我輩藥世脫以詩
名復成何物正如黃魯直所云文章當追配古人不以賢于流
俗而自足也讀竟無任歎仰同里徐元潤

氣韻沈雄似北地議論英偉似卧子結構精鍊似青邱此才何
可以斗石計循環雖誦俯首至地者再道光丙申秋仲從詠仙
同年處假讀數過清如弟吳嘉淦

劍人先生余畏友也甲辰乙巳間應試宣城其名心儀有
年初未識而咸豐壬子仲冬始見之於滬市傾蓋訂交執手如
舊相識明年春上當事書不見用而其窮益甚時余方與西儒
慕維廉改削英志及地理全志上下編因薦君有史才可當其
任久之君自撰英志成惜未授手民自此昕夕過從鬪酒弦詩
談兵說劍無虛日赭寇之亂君避居余城北寓廬前後兩年戊
午以後蹤跡稍疎然猶時袖所作出相質證故余處多有君未
刻詩詞藏於行篋君詩前四卷爲友人醵資助刊早經問世骨
采高雄華實竝茂於綺麗雋逸中時有清剛之氣所微嫌者樂
府擬古之作居其半而自見真性情真面目處反少然以觀近
人所作大江南北殆無與抗手非虛譽也同治元年閏八月下

泮展讀於天南遞窟因誌數語吳郡王韜

嘯古堂詩集目錄

甫里逸民王 輯

卷一

古今體詩七十四首

卷二

古今體詩六十一首

卷三

古今體詩七十六首

卷四

古今體詩八十六首

卷五

古今體詩五十四首

卷六

古今體詩七十九首

卷七

古今體詩六十七首

卷八

古今體詩九十三首

嘯古堂詩集卷一

寶山蔣敦復純甫著

長洲王 韜子潛栞

有所思

有所思兮在洞房流蘇寶帳芙蓉牀
瑤釵錦瑟紛兩旁明珠翠羽梳華粧
蠟燭熒熒照臉光麝煤曉墮鑪煙香
鑪煙不結同心篆盛年空抱鴛鴦券

仙人引

璚牕夜雨桃花黑百幅龍綃淚絲織
憶昔初彈神雪寒天風影盪紅闌干
凌華回語上元笑芙蓉翠尾珠鸞叫
歸去攜琴綠玉囊銀灣延睇無津梁

行路難

丈夫失意忽不樂出門萬里提霜鏑黃沙月黑天漠漠貂裘虎
帳盤龍絡壤雲壓山敵氛惡單于夜走禽呼藥嗚呼功成不上
麒麟閣歸去無田事耕穫

長安大道朱門開雕輪繡轂轟如雷遙遙冠蓋去不回貴人置
酒臨高臺平明召客三千來膝前賜女黃金杯長跼再拜稱涓
埃媚行煙視心驚猜嗚呼主家一飯王孫哀王孫顏色如死灰
仕宦不如守錢虜結交不如屠狗戶今日良會宴賓主須臾帳
下奪印組繞牀窸窸鳴阿堵咄哉乃與纖兒伍君不見綠林豪
客虬髯賈眼中有仇頭半取嗚呼世上功名賤如土爲君慷慨
起楚舞

北風吹雪折車軸暮出獵火圍惡木鵲鳴呼月鬼狐哭霜花冷
冷語枯蠲嗚呼古來壯士履危蹙虎豹當路戎莽伏裹尸馬革
願亦是坐守妻子徒碌碌

庭中未開杏花

春陰十日雨濛濛二月枝頭未破紅卻憶玉樓人病起峭寒簾
幙怕東風

桃花夫人曲

玉肌薦枕啼煙夕綠死藤蕪望夫石醜面粧前瓊樹秋細腰宮
裏桃花碧桃花結子春風妒雙蹙紅蛾含薄怒湘水無言倚竹
愁陽臺又喚行雲暮

古詩三首答朱杏孫燾

翩翩兩鳳皇東海飛翱翔丹山振奇翮青天墜微霜神采必有
合羽儀無自傷簫韶成九奏相將獻明堂

猗彼孤生蘭幽花吐春谷佳人良自愛鳴琴理瑤曲一彈天地
清再彈山水綠結交寡所懽千載緬芳躅纏綿遠方書尺素勝
茗玉加餐崇令德此意古所勗

拔劍出門去風霜戒前郵短衣學射虎浩歌起飯牛吾友盛才
氣卓犖今無儔文章本經濟蒼生蒙其休坎坷非所惜常懷世
事憂丈夫豈匏繫努力匡時謀

三國志襍咏

蔡中郎

三臺周歷太恩恩直道猶存抗疏功喪亂依人名士誤文章賈

禍史才空蟬聲冷雨冰弦白笳語秋霜玉塞紅風貌虎賁渾不似琵琶閒唱夕陽中

孔北海

蓋代名高挫逆謀愛才此意足千秋山河氣節交元禮戎馬風塵識豫州薄祚被巢兒輩盡衰朝碩果漢家留平生豪舉思公語尊酒荒涼坐客愁

禰正平

沈沈高宴鼓聲寒文采終教鍛羽翰知已有人修薦表素狂無分作卑官死爲才鬼千秋厲生得姦雄一妒難何地公卿容謾罵可憐名士滿朝端

陰山校獵圖

生不著鐵兩當手縛白額南山旁又不帥羽林隊夜驅黑騎黃
雲塞仰天而笑忽絕纒拂衣請從圖中行燕山十月木葉赤綠
毛野獸踞石脊松杉如吼如攫人白日慘淡奔黃塵怒馬一躍
色飛舞猩紅斗笠紗尺五翩翩細馬來何遲玉鞭搖碎珊瑚枝
有鹿有鹿走且疾雙疑厥角頭著膝射手欲鹿鹿膽飛風勢入
箭箭光出箭在鹿後鹿不前少焉得鹿負以肩獠奴長跽獻馬
首少婦一笑殊嫣然君之圖此太奇想抑塞磊落氣無兩我亦
高陽舊酒徒譚兵馬樂神殊王願君勿作曹景宗三日新婦閉
車中亦勿學馬少游但騎款段鄉里羞佩君芙蓉明月之寶刀
披君葡萄北地之錦袍雪花刁刁風騷騷紅璫瑜舞霜天高美
人一歌白玉珰期門夜獵森千旄君不見彎弓盤馬良足豪無

使轅駒局促徒兒曹

錄別

好讀前溪子夜歌江紅海綠奈愁何人閒錦字回文少天上瑤
花受劫多容易風情黏落絮最難心事託微波自從青鳥西飛
去消息無因問絳河

匆匆燕子話離襟湖上黃鸝舊日音花影紅根先種淚篆痕青
字未灰心仙居樓閣雲何杳秋在瀟湘水更深莫憶酒醒殘月
外漢南楊柳又淮陰

懷古詩八首

吳中

吳會衣冠上國來中原尊俎霸圖開山河氣王簫吹市歌舞魂

歸鹿走臺尚有魚腸埋水冷可憐鳥喙臥薪哀恩恩竟扶東門
日枉費當年破楚才

燕中

蕭瑟寒風易水秋狗屠意氣祖龍愁能銷白日虹精貫未抵黃
金馬骨羞縱酒悲歡三斗血入關生死兩人頭圖窮督亢真成
讖一劍能亡十六州

楚中

暮猿啼罷楚妃宮遷客江南楚國空小雅詩亡留正變大王風
起問雌雄峽開雲雨沾香草天際瀟湘怨落楓千板黃陵祠下
過竹枝哀唱月明中

秦中

長城白骨葬如席誰許華戎錯犬牙天地奇觀三月火風雷疾
卷一 樵沙蒙恬北去銷羸業蜀道西連啟漢家愁說秦時舊明
月咸陽宮闕自樓雅

洛中

九鼎新遷洛邑開梯航玉帛萬方來帝王家世中天下嵩洛河
山出霸才鐘簾幾經兵燹在神州誰使陸沉哀黃旗青蓋須臾
事旋見銅甍臥草萊

沛中

一亭泗上舊山川尙有微時父老傳天子故交屠狗輩英雄隙
迹斬蛇年萬家湯沐高臺酒四海風雲猛士煙魂魄不教來葬
此長陵抔土事堪憐

蜀中

偏安王業起堂堂多難乾坤再造忙
兩表出師追誓諸一朝入廟配高
光益州將相荊州失赤帝山河自
帝亡太息炎劉天不祚錦官祠下
柏蒼蒼

鄴中

百萬黃巾掃賊氛十年征伐漢將軍
奸雄氣數三分鼎亂世功名九錫
文鐵樂大江歌樂府銅臺老伎弔
夫君漳河寒食東風急知上曹瞞
第幾墳

五代史樂府

朱五經

朱三爾本碭山一奴耳天子以爾
爲節度使爾滅唐家三百祀

華州道上爾爲天子執轡行且行且泣且殺諸王妃主及公卿
作何等事厥禍乃自攬操刀殺爾爾所生生爾可惜宋五經

三垂岡

天下未定英雄死英雄不死乃有子不二十年負三矢對酒當
歌泣敷行大王老矣行自傷悲風落日三垂岡

六臣傳

臣文蔚臣循臣涉臣策臣貽矩臣光逢奉冊璽金寶北面再拜
稽首何從容前天子少陽院今天子金祥殿白馬驛清流血上
源驛朝天笏臣事梁猶事唐中書門下同平章諸公更不及尙
讓早向黃家作宰相

皇后教

殺大臣用皇后敎國柄仍爲宦官盜一乳臭子負乃公入蜀不以功名終魏殺鄧士載唐殺郭崇韜兩人一反不一反不賞之功功已高他日臨河淚如洗郭公若在不至此

周陽五

朱袍白馬野叉來寶刀出手旗門開大呼殺賊周陽五眼中望塵知敵數老成持重不速戰卽此已入名將傳豹死留皮骨不香可惜梁朝王鐵槍

義兒軍

李天下死樂器灰李橫衝死泉鳩哀義兒軍中最驍勇一朝盡滅沙陀種嗚呼明宗之子秦王許王皆不終足報莊宗之子魏王面楊而縊計力窮作英雄死何憾乎莊宗爲兒女死何賢乎

明宗

一尺面

南人相齊邱齊邱作相然而狡北人相維翰維翰作相然而慄
七尺之軀一尺面此而難令彥澤見一尺之面三尺練鑄錯不
成鑄鐵硯

翁皇帝

晉室太后新婦李死罪上表翁皇帝翁皇帝言汝勿憂管取噉
飯毋出涕作賊何如作壻愁石郎富貴太低頭漢兒城上秋風
起腸斷燕雲十六州

再黃襪

黃襪黃襪顏色好兒啼無聲兒骨槁一著褚彥回再著馮可道

以一家物與一家作中書死定名士佛出世亦救不得兩字癡
頑換麻聯此二人者少立名譽同同居住命功積再醮婦馮十
醮大富貴且長壽考

平邊策

沒字碑粥飯僧五季宰相同簿丞手持兔園一冊子不知爾是
何蟲豸村中學究讀論語半部不熟好腸肚布衣獨上平邊策
霸才祇有王文伯

十國春秋樂府

淝上來

淝上來三十六借公頭公勿哭殺用之走師鐸廣陵城中割人
肉余刀一響四十年丹楊夫婦生可憐江北楊花飛作雪東海

鯉魚飛上天

左牙兵

學禪讓不可謂非篡學兵諫不可謂非亂有無君之心而後動
于惡趙穿弑君盾曰請主其謀而避其名奈何獨執左牙兵左
牙死右牙喜奸雄假手盡如此不斬賈充斬成濟

止勸進

鸚鵡洲邊禰正平蚬蜢坡下汪台符殺其身亦一知己生才亂
世常遭屠宋公狡獪無學問九華山作終南徑叩頭請離太子
婚卻悔貽書止勸進

監軍哭

紫金山前插大鼓壽陽城頭血如雨老臣有死不事仇縣以太

白幼子頭夫人不哭監軍哭忠孝詎作家門辱竹龍十萬城不下北軍空唱檀來也

索韡笏

生不勸節度降死不負永陵土南望再拜索韡笏致命實維寡君故肉臺盤設聲伎陳豪士慷慨爲純臣金杯玉盃盛狗矢宰相媿殺馮延巳

兩文士

江南有一韓絲竹可比東山安江南有一徐詞賦可比蘭成庾伎院行歌乞兒樣昌黎無賴避作相隴西碑版手勒成僕射忍忘故國情咄咄兩文士迺非狎客比秀才君臣少經濟江南時事可知矣

王一來

十軍阿父尙作賊莫怪武陽賊王八賊王八竟作天子笑倒武
陽塚中鬼峽江鐵鑠阿魏開金牀兔子死可哀灌口祇神作回
鶻成都酒樓王一來

唐補闕

花樹韋尙書新津馮長官不如墓碑自題唐補闕臣雖草莽臣
節完五危二亂上封事劉備孫權已生世青城賣卦梅福心惜
哉竟爲王氏禽九死不學秦婦吟

卷簾使

手麾白羽被鶴氅名士當如諸葛亮運用之妙存一心讀兵書
卒爲人禽雕面惡少二三萬胡牀據坐不能飯十三姣小美男

子不如仍作卷簾使

修降表

蜀中妙手修降表前有譙周後李昊蜀中將軍誰斷頭夔州自
焚高彥儔可憐李昊生不及彥儔死兩家後主盡亡國下筆欣
然修蜀史

小南強

羊頭二四白雨至兔絲吞骨女豬媚雲華御室碧落天冠珮獨
拜盧瓊仙老蛟青霧出嶺海雒州刺史鑄枷待手持玉挺長降
王末麗香死小南強

立銅柱

重五千斤長丈二臣宏皋銘臣勅誓南十三部西七州世世不

反視彭氏彭氏亡馬氏昌伏波勲業垂湖湘金鞭打馬銅柱折
銅柱不折土龍出

羅江東

十上不第唐社傾大聲疾呼請舉兵讀書本識忠孝字英雄不
合依人死布衣蹈海不帝秦高駢宋威非人臣奈何錢氏亦弗
用籠壁紅紗安足重戴天之仇不可共孔子齊戒沐浴告魯公
三子者與陳恆同君不見羅江東

一高郁

荆南弱淮南讎廣南志不圖金甌上奉天子下富國成大業者
此人力獅子漸大能咋人敵國最喜誅謀臣吁嗟乎將軍兄弟
自屠膠安用區區一高郁

陌上花

陌上花花始開山頭衣錦春歸來陌上花花盡放錢塘八月秋
風唱陌上花花始殘綵繩繫宅銀瓶寒陌上花花盡落還我河
山夢中索花落花開奈爾何江南緩緩踏青歌可憐陌上花無
主行人又種冬青樹

潮水來

潮水來巖頭沒潮水去矢口出金鳳歌春燕語胭脂山鴛鴦樹
九龍帳裏一龍死爾忘乃父不肯閉門作天子且覓富商官利
市

失匕箸

東西稱臣南北賣莫作荆南高無賴朝爲奴隸暮王侯狡獪已

勝人一籌勸晉滅虢禍自啟且幸舐糠不及米他日聞雷失匕
箸飛馬襄州斬關去

湘陰公

天子一名補白版兒能爲之父亦赧主劉氏者漢中王一騎恨
不下太行人殺其子已爲帝梁三東望馬陵涕崔兒已死郭氏
終公亦勿哭湘陰公

歲暮吳門客感

殘臘關河客思遙天涯無那鬢蕭蕭詞場跌宕呼青兕酒市悲
涼換黑貂畫閣一鐙簫語隔湘簾三尺劍花飄故園回首眞愁
絕鹽米光陰意暗銷

狂名鬼亦笑胡盧未敢人前道博徒碧海尋鷗孤夢冷青山捫

蟲霸才麤迢迢冰雪梅花瘴滾滾風塵駿馬圖寂莫吾生怕孤
負千秋償得此心無

題燕

簾外春風燕子飛傍誰門戶計全非江南無限傷心事獨與離
人訴夕暉

寶劍篇

丈夫出門事知己百鍊精金未一試棄擲人間亦已矣爲君慷
慨心不死魚龍寂莫海天秋長嘯還令鬼魅愁聲價千金逢薛
燭功名一日等吳鉤天生此才必有用手血模糊灑灑凍俠客
三更殺賊心將軍萬里封侯夢封侯殺賊兩無成嗚咽牀頭鳴
不平三尺光芒白鵬尾一聲霹靂蒼龍精付與庸奴真短氣安

知不有風雲際身在終酬國士恩時來儻擇于將器君不見縵
胡短後走沙場躍馬風生鐵雨當武皇更下開邊詔直斬樓蘭
請上方

題家清容太史冬青樹樂府後

淒涼鞠部聽誰能南宋湖山問老僧一樹冬青風雨黑四條谿
上咽紅冰

九死難存趙氏孤傷心塊肉浪花塵碧孃空唱平元曲厓海魂
歸陸秀夫

空坑戰後作纍囚萃七孃詩恨墨留一紙家書呼百五他年柴
市骨誰收

莫問先朝買卦人願將薇蕨殉孤臣橋亭若比橋山路腸斷攀

髯竟絕身

參軍帳下歷閒關如意光寒戰血斑披髮西臺眞痛哭富春一角趙家山

鈴語馱花破驛昏曲題金縷斷芳魂水雲歸去黃冠老絕代明妃古佛門

行歌樵牧夕陽中麥飯棠梨祭故宮獨有王孫擅碑板大元年月寫來工

詠古四首

魯連村

鴻鵠翩然四海行如公戰國竟虛生布衣自大無秦帝玉貌能圍有趙城天壤幾人排鉅難風雲一矢出奇兵田巴何物施橫

謫處士從來浪得名

田橫寨

五百英雄盡國殤
島雲海樹鬱蒼茫
生無尺寸齊難霸
死有頭顱漢不王
西楚天亡項羽紀
南蠻春老尉陀鄉
韓彭地下羞相見
烹狗功名事可傷

李陵臺

攜手河梁萬古愁
朔風吹白漢臣頭
飛將軍已爲猿鶴
太史公猶走馬牛
絕塞龍沙空奏曲
故人麟閣早封侯
生降至竟心難白
一劍長含國士羞

賈誼宅

慷慨陳書魏闕開
少年新自洛陽來
蕭曹以後無良相
鼂董之

閒有霸才痛哭動關天下計傷心遲暮美人哀漢廷若肯思前
策七國他年未却灰

明太常寺卿黃節愍公墓

在崑山南十步許初墓已平會
有屋其上雷三擊之發土得穴

遂封焉乾

隆開事

陰飈撼山山骨裂燭電照血血不滅雷聲繞地擊者三白骹一
寸黃泉鐵廼知忠孝天亦憐不然古墓犁爲田黃公遭際建文
世削藩恨不先除燕燕王跋扈必賜死乃父英雄未知子少年
卽非李九江將士紛紛拉朽耳國亡走死二子從馬鞍山下坏
土封四百餘年時代易靈異尙著前朝蹤君不見甯武關前周
家墳壘宮夜徙鯨波分又不見秣陵城下卞侯骨明祖詔勅書
碑文天荒地老陵谷沈惟有忠臣之穴不與狐兔奔竄蛟龍侵

酌公酒揖公墓公平公平滋蔓蔓難圖謀國國已燼公身一死

公心苦公魂去傍西山土

建文帝
葬處

鹿城春感並寄病華間

畫篋詩奩隱綺疏春來眠食近何如濛濛一夜梨花雨
滕與東風十斛珠

利市襦衫忽惘然空勞纖手卜金錢蛾眉一妒真同病更乞卿卿事可憐

當時絮語隔牕紗依約芳年碧玉瓜誰道華嚴仍小劫青泥無分贖蓮花

倦羽驚弦暗自傷年年畫餅太荒唐馬鞍山下詩人塚手搗殘碑弔夕陽

書楊忠愍公集後

請上方之劍可以斷賊嵩頸濺西市之血不可破椒山膽椒山
膽熱嵩頸寒一手格天公獨政前年遠貶忤賊鸞鸞死公復歸
朝端相公吐哺收人望仗馬不鳴公始安公曰吾所學何事浩
然之氣完天地啾啾鬼哭夜方半碧血模糊光照字大書外賊
不足除內賊不可養五奸十惡罪無赦三齋七戒疏迺上上疏
先入政府手權門之下多瘕狗折檻難回漢主心對簿已囊范
滂首枷鎖風吹鐵骨香赭衣從此見高皇他時老賊臥溝壑清
苦記得鈴山堂

嘯古堂詩集卷一終

子同寅伯威甫敬校

嘯古堂詩集卷二

寶山蔣敦復純甫著

長洲王 韞仲弢栞

雜詩

城東桃李花灼灼輕揚葩
眷彼懷春女窈窕出誰家
明璫步容與曉日出光華
芳菲一以莫妖豔紛相誇
歸來理明鏡裴裒徒自嗟

我有鴛鴦綺纖手自機杼
瑤箱十二疊持此竟誰與
迢迢西北樓粲粲舞白紵
一曲千黃金羅裏妙迴舉
君聆貴家樂慎勿輕貧女
貧女貧女不炫飾絕世渺獨處

涼露起遙夕結帶期所懽
華缸澹流素翡翠沈衾寒
空庭石榴

樹房中常苦酸不惜黛眉損念茲羅衣單云何采蕭艾棄捐荃
與蘭微軀妾自保幽賞君獨難

憂來浩無方日月何堂堂壯士出門去拔劍心傍徨今日斗酒
會賓客盈東廂黃金爲母壽白璧爲兒裝鴻鵠舉四海羽翼生
輝光浮雲曷有極仰視天蒼蒼

曰余好畸服佩之明月刀赤精薄嚴霜白雪橫秋濤道逢虬髯
客無乃并州豪意氣一朝合謂余非蓬蒿從軍縛袴褶開邊樹
旌旄還當拂衣去嵩華長遊翔悠悠萬里心揮手風雲高

題黃仲則少府

景仁

兩當軒詩集用集中後觀潮行韻

洞庭微波下木葉一碧天空瘦鶴立誰將明月置君懷題詩忽
挾仙心入仙之人兮雲中停靈旗翠蓋紛相迎掉頭竟去人閒

世天風浩浩江流聲白日走匿黃河折心折冰雪骨折鐵長嘯
還驚天地秋狂名祇博關山雪驟綱病鐸車遙遙荒村鬼語明
星高丈夫生既等牧豎頭顱一擲應飄搖并州黃沙慘欲暮九
疑三湘渺何處萬古身登太白樓一官魂斷秦川樹丹旄西風
愁復愁青天依舊寒雲浮封侯未出靖蛉塞埋骨須鄰鸚鵡洲
我讀君詩長太息鐵虹光焰難銷得君不見敗紙如山冷劫灰
飛作斑斑土花色

止春雨駐匝月矣悵然言別有感近事呈同梅丈

學惺並

示生甫

同孫

仲貽

燕孫

午生

端孫

青鞵布襪幾時休雲水光中宿野鷗草草風花人病酒茫茫塵
海我言愁涼蟬欲語琴心碎古樹無名石氣秋後夜相思渺何

許月明七十二峰頭

茶花灣口埜紅橋冰雪題襟暑漸消名士閉門思種菜美人畫
壁補離騷園棋夜雨鐙前落鬪茗鑪煙鬢外飄白袷諸郎都好
事隱侯家世未蕭條

龍頭聲價劇堪憐蝸角功名一惘然身賤江湖仍小劫魂銷絲
竹況中年紅紗障眼疑窮鬼青史薤頭笑謫仙同是名花偏墮
溷東風吹破白萍煙

梨板休教鏤十行名山心事費商量情多有淚彈黃竹愁儼將
身化白楊絕調銅弦誰獨聽今生玉骨不宜狂百篇金粉空傳
唱手把瑤華懺法王

仲貽將鳩同人鑾
余詩集媿不敢當

琴河感舊

酒醒今宵客未眠雲蘿前度憶茫然人離眉閣初三月秋在琴
河第七弦畫舫明鐙都入夢青山紅豆總成煙天涯莫恨無芳
草零落王孫又十年

拂水山莊

東山絲竹北山文頭白風懷戀夕曛名士兩朝愁史筆美人一
死媿夫君滄桑故國思紅豆花月高樓冷絳雲劫後殘棋空袖
手年年腸斷杜司勳

訪山莊之明日攜香楮酒果奠河東君墓下

澆酒天涯草一堆低頭親爇瓣香來中朝青史憐鈎黨絕代紅
粧解愛才楊柳怕歌思婦曲蘼蕪愁上望夫臺佳人命薄尙書
壽花月滄桑盡可哀

舟行絕句

江湖殘夢憶春宵
近水樓臺聽玉簫
今日更無飛絮影
鷓鴣空唱謝家橋

福山渡江

獨鶴渡江去
天空雲一青
乾坤浮大海
風浪拍秋萍
扼險軍聲壯
揚旗帝子靈
毒龍應避我
看劍酒初醒

賣魚灣弔宋文丞相

海風吹黑到厓山
此地孤臣去不還
烽火一江天
塹失杜鵑聲急
賣魚灣

水繪園歌

園爲冒巢民司李別業
林泉花木甲大江南北勝國名

流 本朝碩彥賦詩燕賞殆無虛日道光丙申秋余遊
雉臯亟訪其址土墉瓦屋斷石危池餘不可問作歌紀
之

雉臯城頭衰草霜天寒木葉飛空塘居人尙識冒家墅青青野
菜黃泥牆冒家奕葉聲華盛淮南甲第連雲峻先人風節著三
朝公子才名傾八俊中原烽火正黏天江表衣冠尙宴然湖海
每畱豪士飲鶯花曾識太平年秦淮簫鼓寒流水鐙紅酒綠悲
歌起家運衰時國運終黨人錮後才人死白頭老父返郊居敗
紙蓼星刺血書松鞠依然鄉井在湖山無恙劫灰餘故園花木
重蒐輯梵王宮枕殘霞碧繡渚芙蓉秋水庵畫隄楊柳春風宅
玉女蓮花割數峰雕甍翠柱簇房櫳蝦簾畫卷文珠碧鳳蠟宵

懸火齊紅媼娥二八青娥侍徵歌選菽聯朋輩擁帚能爲陶穀
姬吟詩便是康成婢陳郎才調太流離少日青衫一卷詞解使
阿雲慰岑寂癡情兒女老夫知閉門從此先生老淒涼忍復譚
天寶風月重逢全盛時煙雲仍畫飄零藁八年棋局小滄桑易
主園林意暗傷香火緣深畱破衲雲鬟影散牘空床匿峯廬下
苔花綠舊巢不認門前樸南郡悲風種白楊西田暮雨哀黃鞠
君不見詠懷堂廢夕陽幽燕子春鐙瑟部愁莫唱影梅庵樂府
月明孤鶴海西頭

范廉泉師來鷗閣雅集圖次原韻奉題

籠煙籠水一城秋大好溪山境自幽手板十年名士鶴頭銜三
品野人鷗隱囊紗帽風前畫碧樹紅牆雨後遊欲采芙蓉憐我

晚不曾先與白雲謀

書唐瘞琴銘搨本後

瑤釵勝夢秋無色素琴冷胃湘煙碧一條弦滴萬條冰冰若不
寒弦不裂銀娃小字署清卿偷謫華鬢便有情絳樹棲鸞剛十
載白花飛蝶已三生總惟明月涼如水琴身未碎琴心死弱薄
難延古佛門枯桐合殉嬋娟子瘞玉蘊香劇可憐夜臺魂抱綠
陰眠人閒祇有青衫客腸斷華年錦瑟篇

東臯詠古和吳梅孫山長

鎧

捍海堰

宋范文正公監
西溪鹽倉時築

高填風浪鎮淮城此亦胸中數萬兵一綫安危爭碧海百年憂
樂爲蒼生寒沙積雪熬波擁落日長虹卷地橫可惜防河公未

領六州鑄鐵竟難成

度軍井

宋岳忠武王經略通泰日道渴拜井得泉數千人飲之不竭

風雷繞地湧寒波秋水橫刀殺賊磨半壁河山炎并熄一江烽火背鬼過星移玉座窺天小花落銀瓶濺血多誰壞長城三字獄石闌秋冷怒蛙歌

丞相原

宋文信國避揚州李庭芝難航海求二王夜宿田家

暮宿楓林鬼火幽側身豺虎欲何求干戈一相南來恨風雪三宮北去愁灑血已書溫嶠檄閉關應斬賀蘭頭厓山東望公無渡慘澹君臣竟覆舟

吏部祠

祀明吏部員外郎許公諱直殉甲申之難

極天帶甲阻南奔攀絕龍髯望九原碧草銅駝無主地青山木

匣未歸魂乾坤骨肉家書淚衣鉢滄桑故相門祀典可憐逢異
代白頭老父歎生存

遊徐生庵少府

珠簾峯園

芳辰步曲沼名園倚修竹夕曦下林臯迴風散蘭薄宛彼茹之
華當秋媚初馥幽人盟素襟與鷗上高閣泠然彈古琴峯霧四
天綠

書勝朝彤史拾遺記後

昭陽鑠夢感忿忿繡佛難聽故殿鐘七載自家身後盡井邊猶
問玉玲瓏

烏蠻小髻學新粧內藏承恩孕日光好是白頭宮監力天顏細
認御袍黃

深夜微吟紅藥詞外家辛苦望門楣邵王墳畔青青土仍種官
湖楊柳枝

武皇內傳太荒唐叛女彈箏王滿堂一事將軍倍惆悵蘆溝曉
墮玉簪霜

西山私祭紙錢飄御軸宮門泣翠翹金盃玉魚亡國恨尙詔阿
母鬢蕭蕭

九門烽火六宮塵蒙面淒涼國母身不種冬青便埋骨茂陵眞
傍李夫人

古意

鬪雞博塞羽林郎上馬挾瑟邯鄲倡來日大難且行樂此君小
異能急衰二千年史眼生鐵十萬里天刀挂霜有所思兮獨不

見太白睽睽煙茫茫

送鄭餘卿

慶之還吳門

鄭生抱琴不肯彈一彈六月飛霜寒美人嬋娟隔明鏡十指凍
裂誰爲懽蔣生倚劍不得試太白離離夜如水那得胸中斗血
涼起逐蒼蠅而已矣兩生十年不相逢大江日夜流萍蓬兩生
一日忽相遇上下追逐如雲龍雉臯城頭漲塵土朔風蕭蕭破
窗戶官齋蕪炭擁不眠冷縮黃紬驚鶯股東西之屋兩頭藏如
蠶裏繭蜂蟄房蔣生好奇鄭生嬌鄭生狷者蔣生狂乾坤偃仄
不得意男兒到此除豪氣白腹何妨據上頭烏衣且勿矜門地
不如鄭生之琴彈向空山青日暮定有哀猿聽蔣生攜劍伎堂
去梨花舞勸雙鬟醒鄭生行矣歌且止作歌者誰蔣生是蔣生

蔣生胡不歸一聲雁叫霜天起

寄懷袁同石

堅

張竹堂

南杞

薄病尖寒酒不溫滿天風雪最銷魂怪來詩思清于水飢嚼梅花冷閉門

記得竹堂詩句好澹煙疏雨翦鐙時儼將百幅雲藍紙鈔徧襄陽播摺詞

歲莫言懷

射雉城頭落葉涼朔風莽莽破繩牀寒蟲四野天無雪獨雁三更夜有霜未換金貂傾綠蟻欲從鐵騎獵黃麇何時料理平生願萬樹梅花一草堂

恩恩燕子認泥痕少日風懷事莫論老將弓刀驚畫角名山衣

鉢託師門春前碧草思尋夢酒後青萍說感恩可惜再來題柱

客不應還是舊王孫

往時在俞允巖都閩署中讀書從江子香夫子遊

讀書憂樂費商量來奉希文一瓣香未澹名心鵬出塞似憐仙
骨鶴分糧黃河樂府翻新曲碧玉才人妬豔妝風雪蓬門何處
是不堪負米問他鄉

荒雞喔喔滿沈沈坐冷愁窩擁鐵衾金粉百篇名士淚玉梅三
九故人心國雲散雪都塵夢泊鳳飄鸞自古今寄與青天一丸
月余情日夜大江深

泥酒

泥酒東風鬢影斜嫩黃楊柳未藏雅春陰如墨畫簾重屋外紅
梅三兩花

上巳日吳梅孫山長招飲於露香草堂

海燕初來不算家一尊羈客數年華
采蘭人去無芳草中酒春寒有落花
烏帽風前搔鬢影青山門外隔天涯
最憐吳質工愁語飄泊鸞皇隱白沙

蟪山寒食

東風又是吹寒食門外棠梨有落花
流盡大江飛盡夢更無鄉信到天涯

插柳人家拜墓田我違丙舍恨年年
浮雲蔽斷天難問不獨傷心聽杜鵑

偕梅孫訪黃楚橋布衣

學地

聽徐道士彈琴

與鷗盟素心春事復幽尋
花氣上禪榻道人彈古琴言歸流水

外相送夕陽深余欲發高唱孤雲眠碧岑

題虞姬畫像

讀書忽哭項羽紀大王之才不爲帝把酒請澆虞姬墳俠女之
志可事君我爲楚歌若楚舞烏江東下無尺土君王意盡妾何
聊頭顱一擲劍花飄悲風蕭蕭起垓下魂兮歸來慰啗啞昔日
軍中羞雉媒今朝帳下嘶騅馬嗚呼古來好色皆英雄安得攜
手常相同辟陽已封戚姬死老去可憐隆準公

城東

城東楊柳欲藏雅錦瑟芳年碧玉家任是風流也狼藉春愁第
一寫桃花

枕畔銀鐙豔豔光妙蓮花底口脂香樊川別有情如海不在鴛

鵲卅六行

檀唇微啟倚紅簫銀甲初調鞞翠腰一曲吳娘慣腸斷隔江殘
夢雨瀟瀟

春暮懷人詩四首

孫楚樓公子

高城鼓角馬蕭蕭拓戟狂歌燭影搖一隊酒兵圍虎帳雙鬢樂
府唱龍標鶯花身世春難遣千鎖文章氣漸銷江北折梅無驛
使月明七十二峯遙

沈仲貽秀才

茶灣微雨碧于絲流水迢迢阻所思牘紙青鐙名父傳香奩紅
藥美人詞湖山古夢生秋鬢風雪殘年問酒卮今日天涯又芳

草王孫可賦出門時

瘦石上人

瓦鐺折足佛泉澄
芋火煨殘慧語能
昨夜東風今絮影
前身明月古禪燈
秋波畫壁師多病
春雨連牀我亦僧
問訊石頭防路滑
華嚴樓閣第三層

病華閣女士

天涯可許替溫存
花下憐卿早閉門
薄酒曉風楊柳夢
畫簾微雨海棠魂
香銷翠鴨餘鐙影
愁勸紅鴉祗淚痕
一寸靈犀暗惆悵
最高樓上易黃昏

題徐生庵長情集

不隔衙城便絳河
迢迢天上淚應多
風鬟小謫啼龍女
玉斧難

修怨藥娥釵鳳夜寒空壓枕細蟬秋瘦不聞歌采雲化去渾無
迹蛺蝶裙腰憶畫羅

慧語如煙豔似霞玉臺夫婿本徐家有情眷屬無情夢長命神
仙短命花畫筆瓊瓏春色相藥鑪繾綣病年華題詩我亦青山
客回首東風絮恨賒

題青藤山人破帽疲驢拜孝陵圖

生不遇高皇帝時死不媿故將軍知出門長揖大江水疲驢破
帽將安之秣陵蕭蕭王氣在白日欲落青山改狹路應逢官長
愁後車愁把狂生載狂生爾何人云是中丞幕府之上賓
參軍多髯主簿短上馬殺賊下馬草檄馳煙塵赭衣廣柳軍門
去海水羣飛夜烏語九塞河山問渴羌六朝風雨悲陵樹陵樹

蒼茫鎖夕陽中官頭白奉丞嘗龍蟠虎踞終銷歇草莽微臣一
炷香君不見布衣絕交謝茂秦琵琶樂府大河濱又不見海雪
畸人廊湛若蠻煙瘴雨琴心託才人抑塞天地間狗屠樵牧相
往還鴻飛冥冥避矰繳數聲杜宇啼空山

題王石谷畫華秋色圖

蘆花蕭瑟水禽呼雨後秋容淡欲無絕似江南好山色十行官
柳倚明湖

觀廉泉師藏楊忠烈公牙印

一白文楊漣之
一朱文文孺

應山古之社稷臣一手帝座移星辰宿衛六日髮盡白先朝顧
命不顧身此印流畱二百祀大名嶽嶽鑄青史委鬼茄花滿地
來劇盡忠肝血凝紫文言獄起鍛煉工豈有貪賊楊大洪封疆

忽入鈎黨禍金帛翻輸賣菜傭獄中一夜臣畢節母住譙樓子
乞食同時左魏亦堪哀維公浴日勲尤烈吁嗟茲印篆勢精朱
文白文六字成不知作手定誰某直與霄壤懸公名陰風出匣
蛟螭走合並精忠壽不朽師藏岳忠武王印一腰金橫玉印如斗錦衣
官校盡闔狗

聞餘卿病臥里門作四十字訊之

與君同骨肉各樣感勞薪魑魅憐吾黨煙霞病此人食眠應自
愛憂患祇宜貧拜母登堂日相逢話苦辛

餞春

輕煙漠漠夢依依餞別東風酒力微前度客來流水去今年人
瘦牡丹肥誰憐江北無芳草可奈天涯有落暉一唱杜秋金縷

曲湖州牋記素心違

嬌紅姹紫屬誰家不隔山巔便水涯
薄命桃花畱病蜨新愁楊柳怕藏雅
迢迢又聽樓頭雨緩緩空歸陌上車
記得江南寒食路踏青時節鬢痕斜

小院葳蕤深鎖門似嫌風雨困黃昏
神僊天上原如夢草木人間已受恩
苜蓿三花調馬地葡萄雙榼聽鷓鴣
村樓臺轉眼繁華逝畱與青山認舊痕

東門祖帳客心驚入饌匆匆到筍櫻
三月煙花揚子渡六朝金粉石頭城
紅江綠海佳人怨豪竹哀絲過客情
從此關河便飛絮一鞭誰爲數郵程

嘯古堂詩集卷二終

子同寅伯威甫敬校

嘯古堂詩集卷三

寶山蔣敦復純甫著

長洲王 韜遜叟栞

井中心史歌

德祐九年大宋孤臣鄭思肖爲位報國寺盟之大神質之天地
日夜望陳丞相張少保統兵至復我社稷還我疆土叫不應半
壁天哭不盡一斗淚以淚糊紙百拜封裹以鐵函投井中井中
有心天水碧心中有血井水紅奈何白雁來紅羊舞蟋蟀經蝦
蟆鼓厓山日月浪花沈柴市衣冠大風怒此時孤臣思肖方謂
氣化轉移必有一日不知睇髮子登子陵西臺而歌曰魂來兮
何極魂去兮江水黑化爲朱鳥兮其味焉食又有白石樵作冬

青樹引日石根雲氣龍所藏尋常螻蟻不敢穴蜀魂飛去百鳥
沈夜半一聲山竹裂嗚呼井中之史胡不借參軍竹如意擊石
而讀之竹石俱碎胡不借高孝兩函骸骨而瘞之髑髏無語土
花香青山醺酒孤臣在

題梅村集

賀老琵琶夜語涼茫茫花月又滄桑才人樂府傷心史黨籍風
流選佛場豈意乾坤成末路難逃江海爲高堂先生祇被聲華
誤重插朝簪鬢有霜

銷夏四首

古藤陰下石苔邊醉後科頭倦後眠白竹簟涼秋入夢青桐花
瘦月如煙三更玉簫飛愁曲一卷金樓蠹字仙不合鬢絲與禪

楊此中容易感華年

不因人熱也尋常上客相逢乞恕狂未許名山終木石可應知
已但文章青刪史筆胸無鬼紅出苔花劍有霜欲向韓門擬翺
籍讀書歲月去堂堂

街譚巷語隔牆分近市塵囂似不聞眾綠牕前生積雨一峰天
外立奇雲樓臺金碧搜殘畫戚里花鈿訪舊聞水繪風流久銷
歇去澆杯酒董孃墳

長日消磨暗自猜綺情俠思兩徘徊櫻桃信遠春前去茉莉香
多枕上開儘有蛾眉傾漢代是誰駿骨買燕臺王郎斫地君休
問磊落人閒已不才

宋宣和御賜團扇拓本

趙家天水秋螢碧素紉冷抱金風泣鶯鶯化去不成煙猶識宣
和舊時筆宣和在御值昇平絕菽丹青最擅名玉洗銅釘親博
古瓊函琳笈覓長生畫院羣材爭待詔宸居暇日揮毫妙青苗
海內怨周公不繪流民繪花鳥奉硯更衣侍至尊秋宮團扇想
承恩明月椒房猶照影涼風桂殿已銷魂塞北青衣雪花凍篋
中捐棄尤堪痛殘山賸水問南朝敗粉零縑悲北宋雲羅手賜
出官家銀葉淒涼望翠華一樣宮庭留粉本蘭金小字署楊娃
讀明史土司傳

支羅西去散毛東簞子坪邊落照紅祇有彭家老宣慰渾河戰
骨殉沙蟲

烏蠻烏撒隸東川小婦氍衫拜馬前多事朝官賜韉襪水西一

夕嫁安邊

大雪山頭望落蘭黃茅白草
膽應寒疊溪水惡龍州遠楊柳聲
聲羗篴殘

小妻煽禍罪難逃東顧朝廷計亦勞
七姓五司宗祏盡海龍圉
上陣雲高

十六營空夜渡河白芳兵少白囉多
南坪已破樊龍死九鳳樓
高一炬何

銀刀掣袖酒初行獵獵牙旗石砭營
可惜文官誤奇策桃花馬
上斷長纓

鄯闡城南葬忽哥西平將種亦蹉跎
銅符一調爭擐甲養禍從
來肘腋多

勾町分治阿迷州獠獐東山肆狡謀好語恩恩便馳去頭顱生
賺一茶甌

特磨羅伽野瘴橫和泥昔樸屬銀生儂家古姓刀家貴教弩齊
驅象戰兵

封疆邀利殺蒲蠻慘毒誰知天道還百口妻孥十三寨啾啾冤
鬼獄中環

陸涼州接平彝衛阿拜江通鴨子塘此是全滇金鑠鑰徙薪從
古慮巖疆

姚州都督置唐朝列戍蜻蛉塞上遙屬國哀牢金齒衛名王平
緬麓川橋

十萬樓船上下江三征蠻甸凱歌長金沙銀夏公無渡鬼哭山

頭白日涼

金樓白象主西南貝葉犀囊奉玉函一自雲仙開貢道累朝中
使覓黃柑

迎水西環香柏城木邦蠻莫寇縱橫線姑不學天孃子但咒紅
蓮寶井生

赤谿銀總石雞孃蕩洞金蟲鬼板郎猫狯狔獐獠獐獠小師太
保大天皇

十衛齊攻馬尾籠九名九姓亂苗宗香鑪山下敲銅鼓可似平
茶拜紀蒙

搗家車里盡遐陬八百爭傳媳婦居南格刺山分兩戒漢庭無
復議狼胥

鬼甸羅施草木新奢香九驛置通津金環如意中朝寵償得將軍撻美人

龍哈唏咳古田猺銀豹金狼十寨招象郡風煙秦代合淮陰苗裔漢時驕

剡馬縱橫龜鼃塘大藤峽口瘴雲荒韓家經略蠻天震十丈穹碑萬仞岡

西原農峒治邕州交趾牂牁要害收十萬山橫卅六洞麗江上下水東流

白山遺孽九司分百粵岑郎舊策勦枉說陽明嫺將略田州不戰但修文

瓊島珠厓海外天鑿開黎峒好屯田山頭五指渠生縛未許南

虵作水仙

題明季諸人遺詩後

夏內史玉樊堂集

十五從軍裹血瘡
哀江南賦恨茫茫
干戈天地愁家祭
社稷邱墟禮國殤
少婦新昏金玦冷
故君野哭玉衣涼
祗今圓泖湖邊路
落日寒濤古戰場

顧處士亭林集

空山杜宇拜遺民
秦隴之間老此身
避地風霜先草木
簪書經濟獨天人
白衣肯附徵君錄
皂帽應留故國塵
二祖十宗何處是
長陵秋祭孝陵春

鄭秀才海雪堂集

亡命餘生破國年瘦騎北鶴拜瑤仙華鬢眷屬天魔隊銅鼓河
山赤雅編香草易鋤吟古怨枯桐獨抱失君絃蛇鎗鳩箭蠻荒
裏愁絕離騷廿五篇

屈山人道援堂集

故國蟲沙冷劫灰離騷苗裔至今哀銷殘半世成仙骨論定千
秋作史才鐵騎邊牆驚獵火銅琶樂府弔燕臺橋山弓劍煤山
樹賸有麻糍慟哭來

兩漢樂府

陳勝王

大楚興陳勝王苟富貴毋相忘王侯將相自有種奚必假扶胥
項燕從民望乃知鴻鵠之志同燕雀夥王沈沈樂莫樂

萬人敵

書足記姓名而已劍一人敵不足學學萬人敵耳大王以力爭天下位出諸侯王不敵泗上一亭長真天亡是兒少有大志他不可耐彼秦皇帝指直可取而代

刎頸交

越人交車與笠雷陳交膠與漆誠不如大梁布衣刎頸交不刎頸交頭不梟耳頭千金餘五百貴者封王賤者一錢竟不值信陵君家無此客

田橫來

始與漢王南面俱稱孤漢王爲天子橫爲亡虜胡爲乎斬吾頭馳三十里漢王無恙橫來矣河山百二圖籍收海外尙有五百

頭

萬家置

少年貧無行不能推擇爲吏又不能治生作商賈廼能爲其母
營葬地令旁可萬家者置守墓嗚呼此其志已不貧悠悠寄食
食哀王孫

借一箸

滅諸侯嬴氏強王諸侯項氏亡刻六印爲鄼食其借一箸乃張
子房子房五世相韓者不願韓王有後也

蕭相國

蕭相國爲秦刀筆吏錄錄未有奇節蕭相國上沛公壽奉錢五
百蕭相國下廷尉獄械十數日吁嗟乎蕭相國

王呂氏

高皇帝棄太后臣請宿衛中高皇帝王劉氏臣請王呂氏臣亦得丞相封臣爲高皇帝奇計六出臣請爲太后計劉氏天下以呂易惜哉佐命之勳不再立死樊噲生周勃

天下才

賈生賈生天下才絳侯灌嬰庸奴哉用之高祖及武帝一朝生縛單于來區區痛哭長太息不解事耳大臣側君不見子蘭令尹三閭沈公孫丞相江都黜

灌氏族

丞相肯過魏其魏其夫婦躬治炙魏其今日行酒丞相賓客半膝席其一老秃翁無以溷乃公乃公罵丞相座爲魏其哭奈之

何不灌氏族

飛將軍

李將軍才氣天下無雙結髮與匈奴大小七十餘戰終不得尺寸封平陽家奴責對簿急獨有昆邪爲上泣

貳師將

牛十萬馬三萬戍卒十八萬發酒泉張掖還入玉門者萬餘人馬千餘匹取宛善馬數十獲王母寡頭封貳師將軍廣利爲海西侯

泉鳩哀

高廟老人夜半呼殺人子多矣能無及乎太子生與兵終始武皇開邊意不止邊門開江充來天馬至泉鳩哀悲風日夜望思

臺輪臺白骨生蒿萊

匡說詩

斬郅支單于頭立功萬里受人賂遺數百萬不止其人自不廉
國家所以用人不在此附中貴人意故抑之彼哉彼哉匡說詩

霍光傳

伊尹之志天下信霍氏之事不可訓太甲不能聽霍氏病已偏
能殺伊尹有安社稷勳惜爲妻子戀當時未生司馬兒後世不
讀霍光傳

五鹿客

牢耶石耶五鹿客耶印何累累緩若若耶伊徙雁鹿徙菟去牢
與陳寔無實

斷袖起

前將軍望之自殺丞相嘉下吏死漢待三公只如此石顯一刑
餘董賢美麗良可喜麒麟宴罷臥椒房玉體半牀斷袖起

折檻臣

誅佞臣上方劍旌直臣殿中檻平陵少年借客報仇恨不先斷
安昌侯頭大儒嶽嶽面生泚身爲帝師黨王氏梅福一朝棄妻
子

平陵東

東郡太守故丞相方進子兵以義起惜哉首事死丈夫一死故
當烈不媿家門禍族滅漢之翟義公唐之徐敬業

莽有子

周公殺兄莽殺子大義滅親竟相似周公無兄莽有子莽賢于
周公遠矣卯金尙未終辛苦學周公血灑屋禍及族公乃自以
爲功

五銖復

黃牛白腹五銖當復人苦不知足得隴望蜀一朝連刺二大將
東面稱帝殊崛強同時逐鹿天下譁莫笑子陽井底蛙

狡兔怨

美田宅厚妻子其保富貴勿與吏事天下不以馬上治世祖一
事勝高祖功狗不烹怨狡兔今年誅韓信明年殺彭越二十八
宿光煜煜

廢郭氏

仕宦當至執金吾貧賤之交不可忘娶妻當得陰麗華糟糠之婦不下堂仕宦而至天子娶妻而廢郭氏人生得意意外事田舍翁多收三斗穀亦如此

君房癡

君房素癡今爲三公寧小差吁嗟乎三公不癡當復誰懷仁輔義天下悅阿諛順旨要領絕

馮敬通

勸景將軍誅王莽使耿將軍據上黨與田將軍書更始尙在流涕守死不曲項咄咄馮敬通有古烈士風不世才略不遇終先時佐命皆三公

竇車騎

出雞鹿塞臨鞞類海登燕然山大鴻臚持節郊迎三十里班師
還無何天子怒家屬徙合浦北面自剄徒自苦恃寵而驕雖盛
必撓借問竇車騎何如霍票姚

頌西第

文士往往無氣頌東巡不已頌西第左手據天下之圖右手扼
其喉愚夫不爲壯夫有時而爲之無貲之軀那便飢寒死始鄧
氏終梁氏

黃巾來

黃巾不來禍不解黨人才出黃巾下如何滄海作橫流乃以獨
木支大廈儒林祭酒太學生恐與劇盜同縱橫失笑黃巾來徧
地車前猶拜鄭康成

二義士

甯與臧洪同日死不與將軍同日生將軍一日殺二義士如此
安足圖功名淮南稱號遼東走四世三公賤如狗登壇慷慨有
餘哀痛飲蒼茫河朔酒

知劉備

孔北海知有劉備乎英雄未遇氣力孤一語感激聲淚俱蛟龍
往往藏泥塗君不見閉門種菜英雄老天下誰知君與操

七夕寄題瀟煙樓

以如三秋
兮爲韻

匏瓜無匹感離居墨會靈簫事總虛昨夜銀河憶秋夢前身玉
女感真如閒情風月原多恨綺習神仙尙未除卻好兩頭纖樣
子人閒天上照懽娛

雙飛孔雀記東南乞巧穿鍼事事諳秦女青鸞簫尺八漢宮紅
蠟月初三似聞環佩香風遠微見簾櫳玉露涵枉說長生留密
誓金釵鈿合更何堪

怕替雙星脉脉愁等閒花入曝衣樓依然雲水難爲別如此關
河始到秋萬古懽場仍易散三生頑福幾時修紅男綠女還多
事偷祝芙蓉愛並頭

梧桐露下太清淒珠斗闌珊玉漏低浪影迢迢人去也雲情渺
渺目愁兮累他靈鵲空橋渡好語天雞莫夜啼若問支機舊時
石紅牆咫尺幾曾迷

書黃忠端公集後

搗骨鍊藥天不補嶢嶢之鐵亦不腐塗肝鬻鐘口不靈夢夢之

帝亦不醒麻衣苴杖不祥物白虹殿上赤鷹擊一擊撓鱗再飼
虎豐狐九尾狺狺怒火雲燒天月蝕蟊紅頭蟲子來神都蒼龍
入地蒼鵝出渡江一馬雌伏櫪玉衣粉碎金甌缺孝陵松柏陰
風吹奈何去我卿且止袞袍血淚高皇帝孱王悍帥饑甲兵隆
武踐祚存空名蛭頤螻臂門蟻命嫫關戰罷元黃盡畫符莫貼
闔風門老臣不食高皇言銅山深井病螭哭乾精墮海光作作
謁胡安定先生祠和祁春圃尙書韻

眞先生里舊祠扁淮海東來過客聆遼夏功名雙鬢白蘇湖衣
鉢一鎧青麟臺黜配無安石鹿洞遺規有考亭我欲瓣香修後
進玉梅花薦古銅瓶

題元遺山集用集中野史亭雨夜感興韻

金源有遺民風節我獨收國亡身未死公卿不敢舉日暮行空山微聞杜鵑語茫茫野史亭鬼唱逗秋雨

漢玉剛卯歌

乾隆癸丑嘉定錢徵君

大昭

得玉于山左四面正方中

有圓孔面刻字各兩行行四字篆筆兼隸體漶不可辨案漢書晉灼注讀之文曰疾日剛卯帝令變化順爾固伏化茲靈矣既正既直既觚既方庶疫剛瘳莫我敢當文與此玉正合惟靈作兩觚作角瘳作單蓋從省爾徵君之孫師徵作剛卯攷示余屬爲詩紀之

方觚四面圓中央三十二字字八行長一寸許廣及半白脂艷艷紅絲藏漢承秦制代古戟乃命正月疾日剛用作雙卯首刻

玉佩之天子諸侯王帝令夔化及四方庶疫剛瘴莫我當是名
射魃卽欬改驅逐精魅除不祥官儀畫一慎興服貫以赤罽縣
珠光西京末造篡新莽變亂觚闕塗明堂詔去剛卯衆莫佩妄
意圖識禪帝王白水真人膺赤伏此物頓應還舊章奈何淪缺
等玉璽殘灰巨燼瓦礫場彭城往日嗜奇癖珍獲云是齊魯卿
搯文隸勢憑莫辨土花疊碧苔癭黃虛堂鬼手不敢攬炎精睽
睽生秋芒文孫寶之作秘玩搜攷圖籍徵琳琅儷以金石及瓦
當長生延年永無疆

閒憶

香未燒殘酒未醒不成情緒太等丁秋于涼雨添絲鬢人在明
河憶女星短櫂蘋花鄉夢白亂山螺髻客愁青牽牛落盡空墻

冷彈瘦湘弦鬼陪聽

楊柳蕭疏綠不遮樓臺高處卽天涯古傷心事惟明月今斷腸
人空落花除是煙痕飄袖雪怕無鐙影隔隱紗將身悔作閒飛
絮曾到春風道蘊家

重九日廉泉師招集菩提社登高奉次原韻

竟無風雨過重陽竹裏行厨共舉觴
禪榻花同秋士瘦癭瓢酒入木奴香
盟心江水知鷗熟說法官場比佛忙
日莫憑高莫回首淮南山好是他鄉

嘯古堂詩集卷三終

子同寅伯威甫敬校